


# TEZAU LITURGIC

19 MAI

# ACATISTUL SF. CUVIOS CORNELIU DE LA KOMEL



MOSCOVA, 2000



**Акафист**  
**святому преподобному**  
**Корнилию, игумену**  
**Комельскому, Вологодскому**  
**чудотворцу**

**Кондак 1**

---

Избранный воеводо, Богом врученного тебе полка воинов духовных, и предивный в чудесах, преподобне отче наш Корнилие! Восхваляем подвиги твоя в песнях хвалебных, и молим ти ся прилежно: яко имеяй дерзновение ко Господу, молися выну о спасении нас грешных, и молитвами твоими богоприятными, от всяких нас бед, временных и вечных, свободи, да зовем ти: Радуйся, Корнилие, великий чудотворче.

**Икос 1**

---

Ангела земнаго и человека небеснаго, яви нам тебе всея твари Зиждитель, преподобне отче Корнилие: провидев бо благоплодие души твоея,

от юных лет избра ты служить Ему в преподобии и чистоте, нам же, чтущим тя, внушает вопити к тебе:

Радуйся, благородных родителей сыне боголюбезный.

Радуйся, благочестивыя четы прозябение благодатное.

Радуйся, от младенчества на службу Богови освященный.

Радуйся, от юности на подвиги духовныя предъизбранный.

Радуйся, светлость сана боярскаго Христа ради презревый.

Радуйся, служить Царю Небесному преискренне восхотевый.

Радуйся, сего ради службу царю земному оставивый.

Радуйся, на подвиги поста и молитвы ревностно потекий.

Радуйся, в обители преподобнаго Кирилла во иночество постриженный.

Радуйся, в послушании старцу твоему зело преуспевый.

Радуйся, труды великия в хлебне неленостно совершивый.

Радуйся, вериги тяжкия на теле твоём носивый.

Радуйся, Корнилие, великий чудотворче.

### **Кондак 2**

---

Видев Господь твоя подвиги, бдения, сухоядения и молитвы, преподобне отче, осени ты божественною благодатию, и дарова ти силу и крепость, трудитися в послушаниих монастырских сугубо противу других братьий, ихже немощи с любовью носил еси, и уроки им данныя в работах за них исполнял еси, нощи же в молитвах коленопреклоненных провождал еси, зовый немолчно Христу Богу: Аллилуиа.

### **Икос 2**

---

Разум духовный тебе свыше дарова Бог, досточудне отче, имже добре рассуждал еси, что есть воля Божия и что воля человеческая; первой убо всецело повинул еси, вторья же всячески избегал еси послушати, и был еси истинный угодник Божий, достойный нелестных похвал таковых:

Радуйся, чудоточного древа преподобного Кирилла отрасли благоплодная.

Радуйся, обители его святых питомиче Богом прославленный.

Радуйся, иноче богоугодный, Богу, а не человеком угождавый.

Радуйся, смирением высокая стяжавый.

Радуйся, Писаний божественных неленостный изучителю.

Радуйся, книг душеспасительных трудолюбивый списателю.

Радуйся, в снискании мудрости духовная с любовью подвизавыйся.

Радуйся, добродетели древних богоносных отец себе усвоивый.

Радуйся, слова и учения их в сердце твоем запечатлевый.

Радуйся, яко пчела мед негиблящий богомудренно собиравый.

Радуйся, бразду душевную добре возделавый.

Радуйся, слезами молитвенными ниву сердечную у плодоносивый.

Радуйся, Корнилие, великий чудотворче.

### Кондак 3

---

Силою Божиюю руководимый, оставил еси, отче Корнилие, обитель, тебе духовно воспитавшую, и яко муж совершен, подвиг странничества Бога ради на ся восприял еси, обители иноческия обходя, и в них житию духовному поучаяся, да возможеша сердцем и усты благоприятно воспевати Богу ангельскую песнь: Аллилуиа.

### Икос 3

---

Имея помысл чист и непорочную душу, преподобне отче, вся добрая и душеполезная, в странствии твоём виденная и слышанная, слагал еси в сердце твоём, и теми поучался еси богоугождению истинному, егоже верх — святая любви. Сию убо себе усвоив паче иных добродетелей, верный подражатель Христов был еси, и немощи немощных любвеобильно носил еси, во еже всем звати тебе:

Радуйся, богомудрый странниче.

Радуйся, Христов избранниче.

Радуйся, краснеи нозе твои в путь спасительный направивый.

Радуйся, странствие воистинну душеполезное совершивый.

Радуйся, от Новоградскаго святителя Геннадиа любовью о Христе почтенный.

Радуйся, превозношения человеческого избежавый.

Радуйся, в пустыню от почестей земных сокрывыйся.

Радуйся, в места неудобопроходимая удаливыйся.

Радуйся, смирения стяжателю.

Радуйся, крине пустыннаго прозябения.

Радуйся, маслино небеснаго насаждения.

Радуйся, Корнилие, великий чудотворче.

#### **Кондак 4**

---

Бурю скорбей пустынных мужественно претерпел еси, подвижниче Божий, и преходя от места к месту, Комельския пустыни достигл еси, идеже в обители разбойников небоязненно вселился еси, место, беззаконии оскверненное очистив и освятив, на немже деннонощно возносил еси хвалы Богу, и пел еси Ему во умилении глубоцем: Аллилуиа.

## Икос 4

Слышавше разбойницы твое им изобличение,  
и видевшe небоязненное мужество души твоея,  
яко прещения их не устранился еси, готов сый  
смерть прияти от рук их радостно, оставиша тя  
в покои, служити Богу на избранном ти месте,  
идеже ныне чествуем тя, взывающе тебе сие:

Радуйся, пустынночe, земных пристрастий  
чуждый.

Радуйся, постниче, умертвивый страсти  
воздержанием.

Радуйся, мужество крепкое о Христе явивый.

Радуйся, враги невидимыя до конца  
победивый.

Радуйся, разбойническое жилище в селение  
Божие претворивый.

Радуйся, разбойников прещения ни во что же  
вменивый.

Радуйся, любовью злобу победивый.

Радуйся, смирением ненависть укротивый.

Радуйся, разбойников, ограбивших тя,  
вразумивый чудесно.

Радуйся, книги твоя, ими похищенныя,  
возвративый преславно.

Радуйся, учителю благочестия.

Радуйся, наставниче богомудрия.

Радуйся, Корнилие, великий чудотворче.

### **Кондак 5**

---

Боготечное светило быв, сиянием  
добродетельнаго жития твоего привлекл еси в  
пустыню Комельскую пустыннолюбивыя иноки,  
сожительствовати тебе, преподобне отче: ты же  
по глаголу Христову, грядущих к тебе не изгонял  
еси, но с любовью принимал еси; и тако в  
пустыни твоей устроиша обитель святая, в нейже  
иноков лик, тобою управляемый, пояше Богу  
хвалебную песнь: Аллилуиа.

### **Икос 5**

---

Видевше тя ученицы твои богоносна и  
равноангельна житием, возжелаша соорудити  
храм Божий на месте подвигов твоих  
пустынных, преподобне отче, ихже желание  
исполняя, храм первый, во имя Богоматере, в  
пустыни твоей построил еси, своима руками в  
деле построения его труждаяся. Сия труды твоя

воспоминающе, святче Божий, приносим ти пение таковое:

Радуйся, подвижнице совершенный.

Радуйся, трудолюбче нелицемерный.

Радуйся, усердный слуго Матере Господа нашего.

Радуйся, во имя Ея святое храм Божий в обители твоей соорудивый.

Радуйся, Ея покрову благодатному обитель твою препоручивый.

Радуйся, помощницу Ю во всем всегда имевый.

Радуйся, пустынный жителю, грады и веси исполнивый славою добрых дел твоих.

Радуйся, селение разбойников наполнивый подвижники благочестия.

Радуйся, пустыню в град претворивый.

Радуйся, дебрь неудобопроходимую иноками населивый.

Радуйся, многи скорби и биения от разбойников претерпевый.

Радуйся, нищету духовную зело возлюбивый.

Радуйся, Корнилие, великий чудотворче.

### **Кондак 6**

---

Проповедник Божий был еси братии твоей, отче преподобне: рукоположение бо священное восприем от митрополита Симона, олтарю Господню благоговейно служил еси, и таин Христовых совершитель непорочен был еси, поучая неленостно ученики твоя, словом и примером твоим, богоугождению истинному и пению хвалебному Пресвятей Троице: Аллилуиа.

### **Икос 6**

---

Возсиял еси в пустыни Комельской светом добрых дел твоих, блаженне отче, о нихже прославляшеся на земли Отец Небесный – Бог наш: нищья питал еси, странники упокоевал еси, больныя врачевал еси, и всякому просившему у тебе в нужде, доброхотен датель был еси. Темже слышиши благохваления сицевая:

Радуйся, Авраамле страннолюбие возлюбивый.

Радуйся, апостольское нищелюбие себе усвоивый.

Радуйся, всем бедствующим усерден  
помощник бывый.

Радуйся, хлеб твой с убогими разделявый.

Радуйся, странноприимницу и больницу в  
обители твоей устроиый.

Радуйся, чин и устав общежительный  
учеником твоим начертавый.

Радуйся, Антониа Великаго подвигом  
пустынным подражавый.

Радуйся, во имя его храм в обители твоей  
соорудивый.

Радуйся, видением его чудесным утешенный.

Радуйся, обетования благая от уст его  
услышавый.

Радуйся, молчаливая уста имевый.

Радуйся, псалмопению всегда прилежавый.

Радуйся, Корнилие, великий чудотворче.

### **Кондак 7**

Хотение имел еси, преподобне, в безмолвии  
ненарушимом работати Христу Богу: сего ради с  
любимым учеником твоим преподобным  
Геннадием удалился еси в пустыню на озеро

Сурское, на место безмолвное и удаленное от жилищ человеческих, идеже в подвизах отшельнических добре подвизался еси, зовый немолчно Спасу Христу: Аллилуиа.

### **Икос 7**

Новым подвигом духовным вдал еси себе, угодниче Божий, в пустыни Сурстей, и труды ко трудом прилагал еси, удручая плоть твою постом, бдением, коленопреклонением, долу леганием и молитвами непрестанными, яко дивитися ученику твоему Геннадию таковому житию твоему и ревности твоей о спасении душевнем, яже и нас во удивление приводят и подвизают звати тебе:

Радуйся, пустыннаго безмолвия возжелевый.

Радуйся, молвы человеческия уклонивыйся.

Радуйся, пророку Божию Илии подвиги пустынными подражавый.

Радуйся, Предтечи Господню Иоанну житием отшельническим последовавый.

Радуйся, многи чада о Христе духовно воспитавай.

Радуйся, к богоугождению истинному ученики твоя наставивый.

Радуйся, преподобнаго Кирилла  
Новоезерскаго во иночество постригий.

Радуйся, преподобнаго Геннадиа  
Любимоградскаго во ангельский образ облекий.

Радуйся, иночества богоугоднаго в пределах  
Вологодских распространителю.

Радуйся, обителей пустынных основателю.

Радуйся, звездо пресветлая в лице  
преподобных Российских.

Радуйся, благодатная красото святых  
Христовы Церкви.

Радуйся, Корнилие, великий чудотворче.

### **Кондак 8**

Странствуя в пустыни Сурстей, преподобне  
отче, в сиротстве оставил еси обитель твою  
Комельскую, еяже сиротство увидев великий  
князь Василий, сожале о ней и повеле тебе  
возвратитися в ню на прежнее твое  
настоятельство, да управляеши обителию, тобою  
основанною и усовершенною: ты же послушлив  
сый воли Божией, в повелении благовернаго  
князя тебе явленней, со усердием в обитель  
Комельскую возвратился еси, и радость велию

сим братии твоей сотворил еси, во еже вопити им благодарными гласы ко Господу: Аллилуиа.

## Икос 8

Весь в Бозе быв богомыслием молитвенным непрестанным, преподобне отче Корнилие, и ближних твоих о Бозе зело возлюбил еси, наипаче же нищих и страждущих, меньших о Христе братьей твоих, ихже во время глада щедродательно питал еси, всякому нуждающемуся милостыню неоскудно подавал еси, и малыя дети любвеобильно призревал еси, как отец чадолюбивый. Темже тебе подражателю милосердия Спасова, вопием хвалебно:

Радуйся, преподобне, преподобием хриstopодражательным украшенный.

Радуйся, богоносне, Бога и ближняго твоего совершенно возлюбивый.

Радуйся, нищих питателю.

Радуйся, странных упокоителю.

Радуйся, страждущих утешителю.

Радуйся, вдов и сирот защитителю.

Радуйся, всяк возраст верных милостынею твоею снабдеваемый.

Радуйся, малыя дети любовь твою о Христе взыскавый.

Радуйся, во дни глада от житниц твоих многия препитаемый.

Радуйся, утробу щедрот твоих скупостию не заградивый.

Радуйся, надежду несомненную на Бога возлагавый.

Радуйся, по вере и молитве твоей, от Бога препитание неоскудно получивый.

Радуйся, Корнилие, великий чудотворче.

### **Кондак 9**

---

Вся добродетели исполнив и совершенно Богу угодив, преблаженне отче, в старости маститей сый, паки оставил еси жезл настоятельства в обители твоей, и на покой отшел еси в обитель Кириллову, да идеже пострижен был еси в иночество, тамо и скончаеши подвиг жития святого. Обаче ученики твоими умоленный, иже не терпящу скорби разлучения с тобою, к ним возвратился еси в обитель Комельскую, и в ней в

безмолвии келейном пребывал еси, благоприятно поя Богу песнь хвалы и благодарения: Аллилуиа.

## Икос 9

Витийство человеческое не довлеет ко изглаголанию многих подвигов богоугодного равноангельного жития твоего, преподобне отче Корнилие: в старости глубоцей неослабно и неленостно подвизался еси в молитвах, бдениих и пощениих, готовяся ко исходу твоему и преселению в вечность. Сего ради тебе, доброму подвижнику Христову, смиренномудренно приносим сия песни хвалебныя:

Радуйся, истинный угодниче Божий, веру до конца сохранивый.

Радуйся, избранный слуго Господень, надежду несумненну стяжавый.

Радуйся, равноангельный человеце, любовь святую себе усвоивый.

Радуйся, последователю евангельскаго учения, вся заповеди его совершивый.

Радуйся, в старости маститей юность духовную проявивый.

Радуйся, в безмолвии молитвенном духовно созревый.

Радуйся, к исходу смертному добре себе приуготовивый.

Радуйся, с горящим светильником добрых дел Жениха Небеснаго сresti готовый.

Радуйся, святое имя Господа Иисуса в сердце и устех твоих всегда имевый.

Радуйся, Именем тем Божественным исцеления болящих совершавый.

Радуйся, благодатию целебною свыше обогащенный.

Радуйся, даром прозорливства от Господа одаренный.

Радуйся, Корнилие, великий чудотворче.

### **Кондак 10**

---

Спасения душевнаго во уповании быв, святче Божий, мирно и радостно возлежал еси на одре смертнем, последнее целование и благословение подавая братии твоей, иже горько плакаху о разлучении с тобою: ты же плачь их утоляя, и по смерти обещахся еси духом твоим не разлучатися с ними, и не оставляти обитель твою, аще токмо соблюдут заповеди твоя и устав тобою им оставленный, в немже поучаеши

благоугождати Богу и достойно возносить Ему трисвятую песнь: Аллилуиа.

## **Икос 10**

Царя Небеснаго Христа Бога раб бывый, преподобне отче, в руке Его Святыя мирно и безмятежно предал еси чистую твою душу, тело же твое многоподвижное, в наследие целебное обители твоей оставил еси, в нейже оно честно погребесе, и токи чудес источает от раки твоея. Покланяющесе месту посмертнаго покоя твоего, святе, умиленно тебе вопием:

Радуйся, кончину праведную получивый.

Радуйся, непостыдно и свято течение твое скончавый.

Радуйся, во благоухании святыни сном смертным опочивый.

Радуйся, со слезами многими от них погребенный.

Радуйся, в храме Богоматере, тобою созданном, положенный.

Радуйся, под кровом Царицы Небесныя посмертный покой телу твоему обретый.

Радуйся, душею твоею святою в обители райския к Ней воспаривый.

Радуйся, от Сына Ея и Бога венцем бессмертныя жизни почтенный.

Радуйся, ликом святых, Престолу Его предстоящих, сопричтенный.

Радуйся, чудесы многими по смерти святость твою ознаменовавый.

Радуйся, от раки твоея честныя исцеления благодатныя источивый.

Радуйся, Корнилие, великий чудотворче.

### **Кондак 11**

---

Пение молебное, у святого гроба твоего совершаемое, угодниче Божий, милостивно приемлещи, и с верою приходящим на поклонение многоцелебным мощем твоим дары благодатными воздаещи, больным исцеление, скорбящим утешение, бедствующим вспоможение даруя, молитвенным предстательством твоим у Престола Господа Славы, Емуже со святыми поеши: Аллилуиа.

---

## Икос 11

Светлыми лучами чудес твоих, преподобне отче Корнилие, обитель твою просвещаеши, и всю страну Российскую благодатно озаряеши, яко славити тя ближним и дальним, преславного чудотворца. Темже и мы грешнии, заступления молитвенного твоего просяще, с верою и любовью прославляем тя по долгу благохвалении сими:

Радуйся, целебниче безмездный недугов душевных и телесных.

Радуйся, помощниче скорый и предивный на помощь тя призывающим.

Радуйся, слепым прозрение милостивый подателю.

Радуйся, расслабленных телом благодатный укрепителю.

Радуйся, в сонних и видениях верная посещай.

Радуйся, болящим здравие явлением твоим подавая.

Радуйся, недужного болярина Симеона пред многими преславно исцеливый.

Радуйся, свещу у гроба твоего чудесно  
воспламенивый.

Радуйся, люте страдавшего инока Корнилиа  
от мучительного недуга избавивый.

Радуйся, ногами болезновавшего Мокиа  
право ходити устроиый.

Радуйся, бесноватаго Прокопия от  
диавольскаго мучения свободивый.

Радуйся, изступленнаго умом Сергия здоровым  
смыслом одаривый.

Радуйся, Корнилие, великий чудотворче.

### **Кондак 12**

---

Благодать многих чудес, от Бога тебе  
дарованную, преподобне угодниче Христов,  
слышав святейший патриарх Всероссийский  
Иов, соборне установи праздновати святую  
память твою во всей Православной  
Всероссийской Церкви, яко воистинну Богом  
прославленнаго чудотворца. Таковое  
прославление твое в лице святых со утешением  
вспоминающе, благодарственно вопием  
Дивному во святых Своих Богу: Аллилуиа.

---

## Икос 12

Поем многая и преславная чудотворения твоя, преподобне отче Корнилие, в нихже видим великую милость Божию к стране Российстей, такового чудотворца возрадившей, и усердно благодарим благих подателя Господа, сиеце благодеещаго Отечеству нашему, тебе же, небесному заступнику нашему, умильно глаголем:

Радуйся, друже Христов, до конца верен пребывый.

Радуйся, сожителю святых, присный Богу.

Радуйся, таиннице Пресвятыя Троицы.

Радуйся, избранный слуго Пресвятыя Богородицы.

Радуйся, ангельских воинств собеседниче.

Радуйся, преподобных украшение.

Радуйся, сосуде божественныя благодати.

Радуйся, сокровищнице даров Святаго Духа.

Радуйся, чудес реко приснотекущая.

Радуйся, сосуде мира целебнаго преисполненный.

Радуйся, телес наших врачу Богом дарованный.

Радуйся, о душах наших молитвенниче богоприятный.

Радуйся, Корнилие, великий чудотворче.

### **Кондак 13**

---

О великий и преславный чудотворче, преподобне отче Корнилие! Призри от горних высот обителей райских на нас земных и грешных, и услыши малое сие моление наше, в похвалу тебе приносимое от истиннаго усердия: еже милостивно прием, умоли Создателя нашего Господа, избавити нас геенны огненныя и мучений вечных, и сподобити Царствия Небеснаго и блаженства святых, да с тобою воспоем Ему во веки: Аллилуиа.

*Этот Кондак читается трижды, затем Икос 1-й и Кондак 1-й*

### **Молитва**

---

О священная главо, земный ангеле, небесный человеце, великий чудотворче, преподобне отче Корнилие! К тебе с верою и любовью усердно прибегающе, умиленно просим тя, небеснаго предстателя нашего: яви нам, смиренным и

грешным, любовь твою отеческую и многомогущее твое заступление; се бо, грех ради наших, не дерзаем с свободою чад Божиих просити Господа и Владыку нашего о нужных нам на потребу, но тебе молитвенника к нему благоприятного предлагаем, верующе несомненно, яко вся благая можеша нам испросити у благости Его, аще токмо восхощеши.

Испроси убо нам, угодниче Божий, у Всещедрого и Человеколюбца Бога, веру праву, благочестие непоколебимое, покаяние совершенное, жития исправление решительное: да прочее не прогневаем Господа нарушением святых Его заповедей и сподобимся прощения грехов наших от Него получить.

Умоли, чудотворче святой, даровати мир и благоустроение стране нашей Российской, здравие же, спасение и на враги одоление. Умоли Бога: страждущую страну Российскую от лютых безбожников и власти их да свободит, и да возставит престол православных правителей; верных рабов Его, в скорби и печали день и ночь вопиющих к Нему, многоболезный вопль да услышит и да изведет от погибели живот

наш. Яко да познают вси противляющися, яко с нами Бог и святии угодники Его.

Сохрани, святче Божий, молитвами твоими Церковь Христову от ересей и расколов, суеверия и неверия человеческого: да цветет в ней святое православие во всей силе и приносит плоды спасительныя душам.

Соблюди от всякаго зла и обитель тобою созданную, и вся живущыя и подвижающыяся в ней по твоим уставом: да целы и невредимы пребудут от искушений врага спасения человеческого.

Призри милостивно и на предстоящя раце мощей твоих и молящяся люди, иже в обитель твою приходят на поклонение, и вся прошения их во благо исполни: болящым исцеление, скорбящым утешение, бедствующым вспоможение скоро подаждь. Всем же нам здравие душевное и телесное, земли плодоносие, тихое и богоугодное житие, благую христианскую кончину и добрый ответ на страшном Суде Христовом, у Всемиловитаго Бога исходатайствуй, яко воистинну имеяй велие к Нему дерзновение.

Ей отче! Вемы, яко много может молитва твоя пред лицом Вседержителя Господа: сего ради крепко на тя уповаем, и на твоя святыя молитвы зело надеемся, яко ты приведеш нас предстательством твоим в небурное пристанище спасения, и наследники покажеш нас всесветлаго Царствия Христова.

Не посрами же, святе отче наш, упования нашего, и сподоби нас вкупе с тобою блаженства райскаго насладитися: да славим, хвалим и величаем великую милость к нам Человеколюбца Бога, Отца и Сына и Святаго Духа, и твое благое отеческое заступление, во веки веков. Аминь.

